

# مولير مصر وما يقاسيه



يعقوب صنوع



# مولىبر مصر وما يقاسيه

تأليف  
يعقوب صنوع



الناشر مؤسسة هنداوي

المشهرة برقم ١٠٥٨٥٩٧٠ بتاريخ ٢٦ / ١ / ٢٠١٧

٣ هاي ستريت، وندسور، SL4 1LD، المملكة المتحدة

تليفون: ١٧٥٣ ٨٣٢٥٢٢ (٠) ٤٤ +

البريد الإلكتروني: hindawi@hindawi.org

الموقع الإلكتروني: https://www.hindawi.org

إنَّ مؤسسة هنداوي غير مسؤولة عن آراء المؤلف وأفكاره، وإنما يعبر الكتاب عن آراء مؤلفه.

تصميم الغلاف: ليل يسري.

الترقيم الدولي: ٩٧٨ ١ ٥٢٧٣ ١٨٧٦ ٢

صدر هذا الكتاب عام ١٩١٢

صدر عن مؤسسة هنداوي عام ٢٠٢٠

جميع الحقوق الخاصة بتصميم هذا الكتاب وصورة الغلاف مُرَحَّصَة بموجب رخصة المشاع الإبداعي: نَسْبُ المَصْنَف-غير تجاري-منع الاشتقاق، الإصدار ٤.٠. جميع الحقوق الأخرى ذات الصلة بهذا العمل خاضعة للملكية العامة.

Copyright © 2020 Hindawi Foundation.

All rights related to design and cover artwork of this work are licensed under a Creative Commons Attribution-NonCommercial-NoDerivatives 4.0 International License. All other rights related to this work are in the public domain.

<https://creativecommons.org/licenses/by-nc-nd/4.0/>

# المحتويات

٧	إهداء الرواية
٩	المقدمة
١١	أسماء أشخاص اللعب وبيانهم
١٣	الفصل الأول
٢٣	الفصل الثاني



## إهداء الرواية

أهدي كتيبي ده لأعز الأحباب، ولألطف وأجل الكتّاب، من بأقواله البديعة، وأفكاره الرفيعة، وعباراته الجميلة، وتصوّراته الجليّة، يسليني في الغربة على الهموم والأكدار، ويحببني في الرياض والأزهار، ويصبرني على تقلّبات الزمان، يحفظه ويحرسه الرحمن، وهو جناب الكونت فيليب طرّازي الشهير، النجيب الأديب اللبيب النحرير، أبو قلب ملوكاني وروح ملائكية، ما يخرج من عنده الفقير إلا وحامل عطية، يسر عين الناظر برؤية وجهه اللي يتلألأ بالكرم والإحسان، ويطرب أذن السامع بحلاوة وفصاحة اللسان، أهديه روايتي يا سادة، وأتمنى له طول العمر والإقبال والسعادة، ده يا ناس أشهرني في سورية، وكتب ترجمة حالي الحقيرة وجعلها بثنائه غالية غنية، وضعت رسمه الحلو هنا في ابتداء كتابي، شوفوه وتأمّلوا في جماله يا أصحابي، وقولوا تبارك الخالق مُحِبُّ الجمال، طرّازك يا سي الشيخ يقيناً بديع الحسن والكمال.





## المقدمة

قال الشيخ المؤلّف بعربيّته المصرية، إلى جناب قُرّاء روايته دي البهية: أهديكم يا سادتي سلامي، وتحيتي واحترامي. وأتمنى لكل أفندي وموسيو وسنيور العز والهنا والسرور. وأرجوكم يا أعز إخواني، من مؤمن وإسرائيلي ونصراني، المحشي من حبكم فؤادي، المحبوبين عندي كأولادي، أن تسامحوا كل الغلط اللي تجدوه في دي الرواية، وربّي يرزقكم في الملايين بالمائة. فالآن رخصوا لي أن أقص عليكم يا كرام، ما قاسيته في إنشاء التياترو اللي أسّسته منذ أربعين عام، على أيام إسماعيل اللي في ذلك الزمان، كنت عنده من أعز الخِلاّن. تارة تضحكوا، وتارة تبكوا، وتارة تشكروا، وتارة تشكوا. من الرواية الآتي شرحها يا حضرة القاري، ترسو على حقيقة التياترو العربي وكيفية أفكاره.

الرواية دي أمام نواتنا الكرام، صار لعبها ليلاتي مدة شهرين تمام، حتى إن أذكى الشبان على ظهر قلبهم حفظوها، وعملوا عليها سهرات وأمام أحبابهم لعبوها.

فالآن سلّكوا اودانكم يا أبناء العرب، واسمعوا روايتي المشخلعة اللي كلها طرب.



## أسماء أشخاص اللعب وبيانهم

جمس: منشئ ومؤسس التياترو العربي عام ١٨٧٠ ميلادية.

مترى: لَعِيب مشهور في تقليد الفلاحين.

حبيب: لَعِيب ماهر في تقليد التجار.

اسطفان: لَعِيب شاطر في تقليد العِيَّاق.

عبد الخالق: خلبوص.

حنين: مُقلِّد الإفرنج.

إلياس: جدع على نِيَّاته.

بطرس: صاحب المكر والحيلة.

حسن: خادم التياترو.

ماتيلدة: لعبية أولى.

ليزة: لعبية أخرى.



# الفصل الأول

## المنظر الأول

(دار متري)

(متري وحسن يتحادثان.)

**متري:** يا أبا الحسن أنا كنت في انتظارك، أتحنفني يا جدد بأخبارك. هل علقت يا عم الإعلانات، وفرقت الأوراق على الأهالي والذوات؟  
**حسن:** دانا صار لي من الفجر داير، أفرق العزائم على الدواوين والدوائر. وما خلّيت لا حمزاوي ولا غورية، ولا موسكي ولا صرافية، إلا وأخبرت يهود ونصارى ومسلمين، أن هذه الليلة رواية جديدة يحضرها باشوات عابدين.  
**متري:** حقًا انت يا حسن أصبحت لهجاوي، وتعلمت المكر ده كله من مولير رئيسنا الحاوي.

**حسن:** يا خواجه متري بخر فمك وتكلم في مولير أبو جموس، أنس كل مكان محيي النفوس. والنبي ما نسوى بصلة من غيره، وخسيس فينا اللي ما يكثر خيره. دا رجل الشهادة لله قلبه رءوف، تارك لنا إيراد التياترو وبيطلع من عبّه المصروف. تراه يلاطف مزاجنا كبير وصغير، والحال إننا أشقياء وهو وحده الأمير.

**مترى:** والله يا حسن كلامك صحيح، عمنا جسم اللي سمّاه خديونا بلقب موليير مصر دا رجل مليح، إنما ما لوش بخت مع الجماعة، الأولاد بيسوقوا عليه الشيطانة والبناات بتسوق عليه الدلاعة. والله ما يوجد مثله في تياترات لندرة وباريس، هو المؤلف هو المدرس هو المبلّغ هو الرئيس.

**حسن:** وده كله ما بيتمرش فيكم، بكرة يجيكم رئيس غيره يخفيكم. انظر يابو مترى يا اللي بالعقل مشهور، إنت انصح الجماعة وإلا فالداوير علينا تدور. أدحنا بقينا الظهر وهم لسا ما جوش، فكيف يلعبوا الليلة قطعة جديدة إذا ما درسوش؟

**مترى:** هم ليلة البارحة وعدوني أنا، بإن قبل الظهر يكونوا هنا.  
**حسن:** أهم ما جوش، والمسيو جسم المسكين في التياترو منتظر اللعيبين. أنا شفته وهو اللي قال لي اجري يا واد، رُح بيت مترى هناك تلاقي الأولاد، قل لهم دا ما يصحش أنا ما نيش حدّامهم، صار لي هنا ساعتين في انتظارهم.

**مترى:** هس، سامع حد بيدق على الباب، دا عمنا اسطفان، اخطف رجلك وهات لنا جسم يا خمران.

**حسن:** على العين والراس، يا سيد الناس (يخرج).

## المنظر الثاني

(مترى واسطفان)

**مترى:** بون جور يا موسيو اسطفان، تفضل يا سيد الغزلان. الله عليك يا مهيج المادامات، يا ساحر البلابل مصبب الحريمات.

**اسطفان:** ما أسعد هذا الصباح، بمشاهدة وجهك يا صاح. كيف حالك يا من للعين قرّة، وللقلب بهجة ومسرّة؟ لعلك تكون بخير.

**مترى:** دبّتي تخرق الأرض يا مون شير. وانت يا أخ زيك اليوم، برضك نازل في بحر المحبة عوم؟

**اسطفان:** محبة إيه وعموم إيه يا جندي؟ إنت اسمع الأخبار المهمة اللي عندي. ده فرغ الهزار وبقي الجّد، وغدّا تسيل الدموع على الخد.

**مترى:** الله لا يقدرّ يا سي اسطفان.

**اسطفان:** أهو قدرّ والي كان كان.

**م تري:** بس يا شيخ ما تصرعنيش، كلامك ده صحيح والا توشيش؟  
**اسطفان:** خد واقرا ده جرنال شهير باسكندرية، يذم ويطعن ويلعن التياترات العربية؛ لكونها عن أصول النحو خارجة، ورواياتها مكتوبة باللغة الدارجة.

**م تري:** والي كتب الكلام ده هو مين، يا هل ترى من أبناء الوطن أو من الأوربيين؟  
**اسطفان:** إيطالياني كاتب هذه الأقوال، كما وإن إيطالياني ذات الجرنال.  
**م تري:** عرفته يا عم، دا رجل بالهَم. دا من رئيسنا جمس بالغيرة بيموت، وكل ما علينا بيفوت ويرانا في لعبة جديدة بنعيد، عوض ما يقول لنا نهاركم سعيد، يقول لنا لعب الروايات دي الهلس عار، ما ينبسطوا منها لا كبار ولا صغار. فقلنا له ذات يوم ورينا رواياتك البديعة، فجاب لنا قطعة شنيعة، مُتتا من الضحك لما قريناها، وتاني يوم في وجهه حدفناها. وقال انه كاتبها بالنحوي بالقاف والنون، مثلاً نحن يدخلون، ويلبس البنطلون، وانتو يشربون ويركسون ويضحكون، وبعد ذلك كلنا ينطلقون.

**اسطفان:** دا رجل مجنون، فلا أحد يعتبر كلامه، ونحن ننجح وهو ما ينول مرامه.  
**م تري:** إحنا نقدر بكلمتين نجاوبه ونسد فمه، ونخليه يهرب ويستخبى في حجر أمه.  
الكوميديا تشتمل على ما يحصل ويتأتى بين الناس.  
**اسطفان:** عفارم يا م تري كلامك زي الألاس.

**م تري:** فيا هل ترى العالم في مخاطباتها تستعمل اللغة النحوية، أو اللغة الاصطلاحية؟

**اسطفان:** المشايخ وأصحاب المعارف والفنون، عمرهم ما بيكلموا بعضهم بالقاف والنون.

**م تري:** بقى رقيبنا الإيطالياني ده رجل مجنون، هو والذي في تأليفات رئيسنا جمس ويطعنون.

**اسطفان:** من خصوص عمنا جمس يكفيه، مدح جرائد الشرق والغرب فيه. دا رجل شهدت له العلماء بأنه فريد العصر، ما أحد قبله عمل تياترو عربي في مصر. وأفندينا — أنعم الله عليه بالعافية والخير — لما لعبنا أمامه سمّاه موليير. وموليير هو مؤسس

التياترات الفرنساوية، وعمّنا جسم منشئ التياترات العربية. فمن وقتها في سراية عابدين، وفي الدوائر والدواوين، ما حدش يسميه جسم يا مون شير، جميعهم يقولوا له يا موسيو موليير.

**مترى:** والله يستاهل؛ لأنه قاسى عذاب أليم، في إنشاء التياترو العربي العظيم. ودرانيت باشا رئيس الأوبرا والتياترو الفرنساوي، اللي كان أصله أجزجي لهجاوي، وكان يضرب حقن لعباس باشا جنتكمان، كان لإنشاء تياترو العربي أكبر عدو ودشمان. إنما جسم دا جدع مگار، طلع عليه خامة وخلق دمه فار. ياما ضحك الخديوي إسماعيل ليلة ما لعبنا في قصر النيل، على لعبة راستور وشيخ البلد والقوَّاص، وقال لدرانيت: جسم ما هوش خبَّاص، أهو نجح وعلم التشخيص لأولاد وبنات، اللي عمرهم ما رأوا التياترات.

**مترى:** وليلة ما لعبنا في تياترو الكوميديّة الفرنساوية، لعبة حلوان والعليل، والأميرة الإسكندرانية، انبسط هو والذوات، وضحكت من وسط قلبها الحريمات. ومن سفر ساعة، العالم سمعت تصفيق الجماعة.

**اسطفان:** وإسماعيل باشا صديق وخيري باشا وعمر باشا اللطيف، قالوا له برافو يا موليير، والله تأليفك ظريف.

**مترى:** إنما رئيسنا جسم ربّة التواضع والاحتشام، ما يحبش أحد يمدحه، ودائماً يقول لذواتنا الكرام: كتابة الكوميديات ما هيش شطّارة، الشطّارة لعبها أمامكم يا أبناء الأمانة. والكلام ده وصلوه لأفندينا، وده سبب محبة الخديوي فينا. أهو أعطانا مجاناً تياترو الأزيكية، اللي بيحضروه ليلاتى الذوات من عابدين والإسماعيلية.

**اسطفان:** يا ليته يا مترى ما أعطاه لنا، الإنعام ده رايح يفرق بيننا؛ لأن اللعبيين واللعبيات بدّهم من الميري تعيين ماهيات. وإلا ما يلعبش منهم لا كبير ولا صغير؛ لأن اللي بيدخل لهم من التياترو ما هوش كثير. أنا شفتهم في الصباح، فاسمعت منهم دا الكلام يا صاح.

**مترى:** هس يا جندي، أنا سامع ناس في السلاّم طالعين، لا بد إنهم اللعبيين.  
**اسطفان:** نظرك في محلّه دول هما بذاتهم، دلوقت يا عم تسمع طلباتهم. إنت شيطان وأنا إبليس، إن كنا جدعان نغيظهم وننصر عليهم موليرنا الرئيس.

### المنظر الثالث

(حنين وعبد الخالق وإلياس وبطرس والمذكورين)



**حنين:** صباح الخير يا متري، بون جور يا اسطفان.  
**متري:** صباح الخير إيه واحنا بقينا الظهر يا خمران؟  
**عبد الخالق:** وإذا بقينا المغرب رايح يجرى إيه يا عم؟  
**اسطفان:** ما تقدرش تدرس الرواية الجديدة ويبقا لعبنا بالهم.  
**إلياس:** العبها انت ومتري يا اسطفان، واقسموا بينكم المكسب يا جدعان.  
**بطرس:** لأن احنا والبنات، حلفنا ما نلعش إذا لم تتعين لنا ماهيات. دا جمس أهبل، لو كان زي درانيت بك رئيس لهجاوي، كان أفندينا رتبّ لنا ماهيات مثل لعيين الأوبرا والتياترو الفرنساوي.  
**حنين:** بقا احنا نحزنّ ومأ يسمع أفندينا إننا بطلنا اللعب لعدم الماهيات يبقى يكافينا.  
**إلياس:** رسييت على حقيقة الأمر يا اسطفان أفندي؟  
**عبد الخالق:** وانت يا متري فهمت مرامنا يا جندي؟  
**اسطفان:** إنتم جماعة ما في قلبكمش رحمة، ده جمس بعد البيصارة صبحكم تاكلوا لحمة، والي ياكل عيش الكافر يضرب بسيفه، الأصيل طول عمره أصيل والخسيس يعمل كيفه.  
**عبد الخالق:** هو أنا اللي كنت أكل بيصارة يا سي اسطفان؟ إنتم يا خواني شاهدين.  
**اسطفان:** البصارة غالبية. دي عيشتك كانت عيش وبصل يا مسكين.  
**حنين:** أمال أنا اللي كانت عيشتي بيصارة يا زربون؟  
**اسطفان:** ما تطولّش لسانك انت عيشتك كانت فسيخ وزيتون.  
**متري:** فُضونا من البصل والفسيوخ والزيتون والبيصارة، الزعيق والخناق ده ماهوش شطّارة.  
**إلياس:** الحق بيد متري، الشطّارة نمتثل لأمر جمس حبيبه، ونلعب له بلاش ونشهره وعمرنا ما نسيبه.  
**متري:** باردون يا سيد الناس، إنت زي القُطط تاكل وتتكر يا إلياس. جمس غائب إنما الحق يُقال، الرجل بيراعي في مزاجنا وبيصلح لنا الأحوال. ادحنا صار لنا بنلعب تاني سنة، وأكلنا وشربنا وشُفنا العز والهنا.  
**اسطفان:** وجمس ما نابہ إلا التعب والمقت، والجري والسهر وتضييع الوقت.  
**بطرس:** ما قلت لكم يا جماعة إن متري وحبيب واسطفان، هم وجمس كأنهم إخوان.  
**عبد الخالق:** كل ده كلام بوش احنا بدنا في الجّد؛ لأن في الدنيا دي ما حدش لحد. إن شا الله ما فلحت التياترات العربية، أنا ما ألعب إذا لم تتعين لي ماهية.

**بطرس:** والله يا عبد الخالق كلامك زين، واحنا كمان نتبعك أنا وإلياس وحنين. يا الله بنا يا حنين يا الله بنا يا إلياس، نشوف لنا شُغلة بلا لعب بلا كسر راس.

**اسطفان:** يا متري دول الجماعة فاكرين، إن في مصر ما فيش غيرهم لعيبين. متري وأنا وحبیب وجدنا اليومين دول عشرين لعيب من أولاد البلد اللطاف، بقى من تهديدهم ده ما حدش فينا يخاف. والموسيو جمس بكلمتين لباشا من أصحابه يتحصل على جاريتين. جاريتين من البيض إياهم الجمالات، اللي يقرأوا ويكتبوا ويحفظوا أصعب الروايات. وانتم تطلعوا بوشكم، وهذا ما ينوبكم من غشكم. الوقت راح يا متري، ده جمس في انتظارنا، يا الله بنا نسرّه بأخبارنا.

**عبد الخالق:** بقى كنتم عاملين عُصبة علينا يا خواجات، ووجدتم لجمس أولاد وبنات؟  
**إلياس:** إحنا نلعب الليلة ونغيظكم ولو بدون فلوس، وبكرة نوريكم شُغل الرجال، وايش تعمل النفوس.

**حنين:** هو احنا يا اسطفان نايمين، إحنا أكثر منك يا متري مكارين.  
**بطرس:** إحنا قبلما جينا هنا ودينا التياترو البنات، وقلنا لهم إذا عصيتم على اللعب تتعمل لكم ماهيات. وشفنا الموسيو جمس من بعيد، وسمعنا بنقول له: نهارك سعيد.  
**حنين:** أنا قلبي بيقول لي إن البنات ماتيلدة وليزة بكلمتين حلوين، يخلوا جمس يركب يروح عابدين، ويقول للخديوي: يا أفندينا عاصية عليّ الكومبانية، ولا راضية تلعب إذا لم تتعّين لهم ماهية. فالخديوي يحب جمس وحالاً نبلغ المراد، وتترتب لنا ماهيات يا أولاد.

**متري:** آه ده أمر صعب، وجمس فيه ياما تعب.

**بطرس:** خلونا نعمل شغلنا، ونقطنونا بسكوتكم انتم الاتنين.

**إلياس:** يسكتوا ليه؟ خليهم يساعدونا بكلمتين.

**بطرس:** يا الله بنا على التياترو؛ لأن الوقت راح.

**عبد الخالق:** والنبي إذا صرنا على قلب واحد ما قدامنا إلا النجاح.

**متري:** بقى رايعين تعملوا الرييتيسيون قدام جمس يا جماعة؟

**إلياس:** نعم، وبعدها نقول له إن إذا قَبَل لعب الليلة بساعة ...

**بطرس:** ما جاب لناش أمر بترتيب ماهيات ...

**عبد الخالق:** ما حدش منّا يلعب لا أولاد ولا بنات.

**اسطفان:** كلام طيب، إنما احنا الليلة عندنا لعب كوميديات عديدة، لعبة الحشاش ولعبة البربري واللعبة الجديدة. وهي كوميدية البورصة المصرية، كوميدية صغيرة ومعانيها بهيئة.

**عبد الخالق:** أنا حافظها على ظهر قلبي يا اسطفان.  
**إلياس:** وأنا تعلمتها على الغيب يا إخوان.  
**بطرس:** أنا ما ليش فيها إلا صفحتين يا جماعة، أتعلمهم لكم في ربع ساعة.  
**مصري:** في اللعبة دي دخولكم قليل يا جدعان، والرَّك كله عليَّ أنا واسطفان.  
**عبد الخالق:** عارفينكم يا حي ماهرين شُطَّار، تحفظوا دروسكم زي النار. إنت يا متري يابو عين كحيله، لك في لعبة البورصة مقالة جليلة.  
**بطرس:** ودي مقالة كلها قوافي.  
**إلياس:** متري يحفظها؛ لأن فكره رايق وذهنه صافي.  
**مصري:** يعني بتتمقلسوا عليَّ؟ طيب أنا أخزيكم؛ لأن ما حدش متلي يحفظ ألعابه فيكم.  
**اسطفان:** إحنا رايعين نرجع ثانيًا للخناق.  
**عبد الخالق:** الله لا يقدر، إحنا اصطلحنا وحصل بيننا الاتفاق.  
**إلياس:** بالله عليك يا متري يا نجيب، تسمعنا المقالة أم كلام عجيب.  
**مصري:** يا سي إلياس سمعًا وطاعة، بس ما تقاطعونيش في الكلام يا جماعة. بقى أنا رايع أطلع في الكوميديا بصفة بانكبير، اللي في لعب البورصة عمره ما شافشي خير.  
**بطرس:** وتقول إيه يا متري؟ هات من تحايك هات، يا قره عين أولاد البلد يا مضحك الذوات.

**مصري:** أقول بعد ما اتنهدي تنهيدة، تفلق الحجر وتتنني الحديدية: لعنة الله يا بورصة على من أنشاك، يدخل الإنسان كافي شره ما يطلع منك إلا شاكي. عشرة آلاف جنيه مصري تمام، حوشتها بصداقة من ذواتنا الكرام، ومن شغل القطن والغلَّة، في أسبوط وفي المحلة. وكنت — زي ما يقولوا — ألحس مسني، وأبات مهني. وكنت دايمًا أضحك ليل ونهار، وأحب التنكيت والهزار. وكل يوم أحد أطلع مع زوجتي وأولادي بعربية، نتنزه في سكة شبرا وبعدها ندخل الأزيكية. نسمع في قهوة عمر آغا نغمة الأوتار، ومن محمد سالم والشنطوري وداود ألطف الأدوار. وبعد العشا نروح للتياترو العربي العجيب، وننسط في لعب متري واسطفان وحبیب، وعبد الخالق وبطرس وإلياس وحنين، ونصفق ونقول عفارم للبنين. ومن هناك نرجع بيتنا نشرب القهوة العظيمة، ونحبس بها نفس دخان شبقات الیسمینة. إنما اليوم الأحوال تغيرت، وأفكارنا الرايقة تحيرت. الله يلعن البورصة ويوم دخولي فيها، ارحم يا ربي عبادك واخفيها. الله يجازي السمسار اللي غواني، وأدخلني البورصة وبمكره عماني. وخَلَّاني أشترى وأبيع أوراق وأترك أشغالي، المشتري يصبح رخيص والمبيع يصير

غالي. هكذا الخسارة من الجهتين، عمري ما كسبت لي يوم في سنتين. أما صاحبي السمسار، بسلامته زي المنشار، يأكل نازل وطالع، وكدا صَبَحَ هو متَحَيِّين وأنا والع. والله أستاهل، ما يصحش إلا أعمل بورصجي، على شان ما تبقى السماسرة تروح عندي وتجي. والواحد منهم يقول لي: نهارك سعيد، اليوم الأخبار عال بدنا نعمل شغل جديد. ونعوّض الخسارة القديمة، اسكت يابو الذهب النهاردة التلغرافات عظيمة. البروسيانى انكسر، والفرنساوي انتصر. هات لي إذن بمشترى قد مائة ألف رنديتا فرنساوي، ناكل بهم اللوز والسكر صدقني أنا ما نيش لهجاوي. أنا سمسار أَحَبَّ ما عليَّ أكسب الزباين، ما نيش زي السمسار إياه الخاين. وكان عندي خبر، سمعته من باشا معتبر. بس خليه في سرك، اسمع مني ده خبر يُسْرَك. قال صاحبنا فرنساوي دخل في عيون الوزير، وراح يتقدم للجندي الكبير. ويعمل له سُلفَة ويدفع بها الكوبون، فكدا الأسعار تطلع، إئذني أشتري لك من المصري قد مليون. آدي شغلتي، في ظرف جمعتين، تكسب فيهم بالقليل، عشرين ألف جنيه يابو خليل. آه وأنا كنت أصدق كل الأقوال، وعلى العُمَياني أعمل الأشغال. فكدا في أقل من سنتين، ضيَّعت ما ورائي وما قدامي وصَبَحَ عليَّ دين. والأدهى إنني خطَّبت بنتي الكبيرة، والمهر ألفين ليرة. وامبارح عم العريس الخواجة حبيب، قال لي يا بابا فرح أولادنا صار قريب. ودفع المهر، يستحق في آخر الشهر. بقى حَضَّر لنا الخمسين ألف فرنك، نعدي ناخدمم بكرة من البنك. آه من الخمسين ألف فرنك، ما عندي ولا خمسين ألف بارة، الله يلعن البورصة ما نابني منها إلا الخسارة. يا ليت الخسارة بس إلا كمان نحول الجسم، والهتيكة والفضيحة وكسُر الاسم. اشملني بكرمك وحلمك يا رحمن، الموت أفضل من دي العيشة اللي زي القطران.

**إلياس:** حقًا الليلة جميع سماسرة البورصة يكفروا، ويحدفوك بقوالح دُرَّة ويصفروا.  
**اسطفان:** حدف قوالح الدُرَّة والتصفير، من جهة السماسرة يجعلوا متري لعيب شهير؛ لأن يتضح من ذلك أن المقالة غاظتهم، وفتحت قلوب العالم بكراهتهم.

**حنين:** هس، آدي حسن يا ربي تكون أخباره ملاح.

**اسطفان:** ايش يا حنين والله ما قدامنا إلا النجاح.

## المنظر الرابع

(حسن والمذكورين)

**حسن:** بون جور يا خواجات.

## الفصل الأول

**اسطفان:** طيب بون جور هات لنا من تحايك هات.

**م تري:** قال لك إيه جمس لما جاي وراك؟

**حسن:** شفته في التياترو وحبيب والبنات هناك. وأمرني أقول لكم من كبير لصغير، تتفضلوا عنده بدون تأخير.

**م تري:** عبد الخالق حنين بطرس إلياس، يا لله بنا على التياترو يا ناس. إنتم تعرفوا قُبْح اللعبيات، وتعرفوا جمس رجل حُر ما يتحمَّلش كلام فارغ من بنات.

**اسطفان:** اتمهمزوا يا جماعة الوقت راح، نجري على التياترو برجلينا يا ملاح.

**حنين:** الحق بيد أخينا اسطفان، على التياترو يا جدعان.

(الجميع يخرجون.)



# الفصل الثاني

في التياترو العربي

## المنظر الأول

(جمس بمفرده)

**جمس:** يعني ما يصحش إلا وأعمل تياترو لأولاد العرب، ما نابني منه إلا عقلي خف وبيتي انخرب. وأنا كان مالي ومال دي الشبكة اللي زي الطين، اللي ما طَرَح لي فيها بركة رب العالمين. كنت رجل مرتاح متهنّي، وكانت الهموم بعيدة عني. واليوم اللي دخلت التياترات، وانشغلت في تأليف الروايات، رُفِعَتْ وانسَلَّيت وانتلف حالي، وتركنتي التلامذة وتعطلت أشغالي. وبقي لي عوازل وعدووين، من الغيرة بالجرائد عليّ نازلين. لكن أنا أتحمل كيد وغيظ الأعادي، على شان خاطر عيون أولاد بلادي. مثلاً صار لي ثلاثة سنين أدُرس بالمهندسخانة، وجميع التلامذة مني مبسوفة فرحانة. فلما أنشأت التياترو العربي الناظر المكّار، علي باشا مبارك مني غار. خصوصاً لما أمره أفندينا يزود لي الماهية، حالاً أمر برفتي من المدارس الملكية. ما علينا ربنا كريم وحليم، يكافي الصادق الأمين ويعاقب اللثيم. إحنا في الجماعة لسا ما جوش، ايش من عالم زفت دول ناس ما يختشوش. بعثت لهم حسن يقول لهم: ده جمس، بينتظركم في التياترو من طلوع الشمس. لا شك إن واحد ابن هرمة عَصَّاهم عليّ، ربنا ينصرني عليه وأدوسه تحت رجليّ. ده مين الي جاي ده؟! حبيب، شاب مسعد لطيف نجيب.

## المنظر الثاني

(حبيب والمذكور)

**حبيب:** بهديك مزيد السلام، ونقبّل إيديك الكرام. أسعد الله صباحك، وزاد في تقدمك ونجاحك. خذ يابو جسم من قلبي وصر، أنعم الله عليك بالصحة وعلى أعدائك بالضر. قلبي يحدثني يا فريد العصر، إنك عن قريب تنشهر في أوروبا مثلما انت في مصر. كلامي ده يابو جسم ما هوش تمليق، إنت تعرفني والله إني حبيب صديق. إذا سابوك الأولاد والبنات، محسوبك حبيب يفضل معاك للممات.

**جسم:** تعيش يا حبيبي تعيش، ربنا منك ما يحرمينش.

**حبيب:** الله يحفظك يا نور العين، بس مرادي أقول لك كلمتين. لكن خايف تزعل عليّ، وتسحب عصاك وتنزل على رجليّ.

**جسم:** ما تخافش يابو الحب عليك الأمان، كلامك حلو على قلبي يا أطف الشبان. صحيح إن كلام الحبيب يقرح، وكلام العدو يفرح، إنما أنا أقبل كلام الحبيب وإن كان مر؛ لأنه صادر عن قلب صافي حر. بقى سمعني كلامك بكل حرية، يا فخر التياترات العربية. **حبيب:** بالله عليك ما بقتشي تكتب لنا روايات، تذكر فيها لفظة حرية وحب وطن ومحاربات. وإلا قل على التياترو العربي يا رحمن يا رحيم، والجِدق يفهم بقى رجّعنا للعبنا القديم.

**جسم:** كلام غريب، يا سي حبيب. لكن كلام مليح، وفي محله صحيح. إنما كل مؤسس تياترو ومنشئ روايات، ملزوم يتّم جميع الواجبات. واجبات معلومة عنده يا حبيب، وهي إن القصد بالمراسح هو التمدن والتقدم والتهذيب.

**حبيب:** مُسلم، وكوميدياتك فيها كل ده، بس ابعدنا عن قولة الحرية والوطن والاستقلال، فهمتني كده؟

**جسم:** بكرة إن شاء الله نتحدث في دي العبارة، إنت فكرني وبرضك كلمني بكل جسارة. إحنا في اللعيبة هما فين؟ الوقت راح ما فضلش على الظهر إلا ساعتين.

## المنظر الثالث

(حسن والمذكورين)



## الفصل الثاني

**حسن** (يدخل ويقول لجمس): سي متري بيصبح عليك وبيترجك، تروح بيته تجد اللعيبية مجموعة هناك.

**حبيب** (يقول لجمس): ما تروحشي اسمع كلامي أنا؛ لأن عيادة وتعليم ما تنفعشي إلا هنا. أهم البنات دخلوا الجنيينة.

**حسن**: أي نعم وأهم قابلين علينا. بقى أنا أروح أئده الجماعة، بيت متري بعيد تحسب لي ساعة (يخرج).

## المنظر الرابع

(جمس وحبيب ثم ماتيلدة وليزة)

**حبيب**: يا موسيو جمس استقبل البنتين بحلمك الجميل، واستحملهم على شان خاطر نجاح وادي النيل. لأن لا شك إن إلياس وبطرس وباقي الجماعة عصّوهم علينا، وأنا رأيتهم داخلين بغضب في الجنيينة.

**جمس**: إنت تعرف حلمي الاعتيادي، أنتصر به بإذن الله على الأعادي. هُس أهم داخلين بدهم يعملوا لنا جُرسة وهتيكة، أما نحن نغلبهم بالبوليتيكة.

**ماتيلدة وليزة** (يدخلوا ويقولوا لجمس بغضب): إحنا ما نلعبش إذا لم تعمل لنا ماهيات، زي ما التياترو الفرنساوي بيعمل للعيبات.

**جمس**: على العين والراس ما لكم إلا رضا خاطركم يا ستات، من أول الشهر أعين لكم ماهيات، مش بس كدا إلا وكمان، أفصل لكل واحدة منكم من الحرير فستان. بس ما تجيبوش سيرة لإلياس وبطرس وعبد الخالق وحنين، وإلا يقولوا لي اعمل لنا ماهيات زي البنتين. وانتو تعرفوا إني أنا اليوم معذور، بقى ما تفضحوش الأمر وخلّوه مستور.

**حبيب** (يقول في نفسه): الله على دي المكر والدخول العجيب، جمس واد فصيح لبيب.

**ماتيلدة**: يا موسيو جمس كلامك عال، بس عرفني الماهية شهري كم ريال؟

**جمس**: ما فيش فرق يا ماتيلدة بينكم وبينني، كل ما طلبتية أعطيه لك على راسي وعيني.

**ليزة**: ألف مرسي يا موسيو جمس انت أبونا، إنت تحبنا وتراعي مزاجنا وهم بس يعرفوا يعصّونا.

**حبيب**: وبعدها يخلو بكم زي العادة يا بنات، وما يطلبوا إلا لروحهم الماهيات.

**ماتيلدة:** إنت والله مثلنا يا حبيب، في موسيو جمس مغرم حبيب.  
**حبيب:** ما تنسيش إن مغرمين فيه كمان، أصحابنا متري واسطفان. وإذا كان الجماعة يسوقوا علينا المرقعة، نلعب لعبة «البربري» أنا وانتو الأربعة. ونغيظهم ونقلع عينيهم، ونخلي الناس تضحك عليهم. إنت يا ماتيلدة فاكرة دورك في لعبة البربري الطريفة، ده لك فيه أقوال عجيبه لطيفة.

**ماتيلدة:** أنا حافظاه على ظهر قلبي وفاكرة كلامه، وإن أراد موسيو جمس أعيده قُدَّامه.

**جمس** (يقول لماتيلدة): هاتِ من تحايك هاتِ، يا أنس كل مكان يا بلبل التياترات.  
**ماتيلدة:** في لعبة «أبي روضة البربري» أنا باعمل ستي بنبة وأبو روضة خَدَّامي. فانت يا حبيب اعمل البربري ورُد على كلامي.

**حبيب:** أنا حافظ على ظهر قلبي دور البربري، وفاكر كلامك اللي أحلى من العنبري.  
**ماتيلدة** (تقلد بنبة وتقول): لسا يابو روضة ما نضفنتش الأودة والوقت راح.  
**حبيب** (يقلد أبو روضة): إهنا ينفضوها ويكنسو من الصباح، والنبي كلام أبو روضة صحيح. يا هابيتنا يا أم الوجه المليح.

**ماتيلدة:** أنا حبيبتك يا زَرَبون؟ أنا سَتِّك يا ملعون. أنا ست حرة يا بربري يا مفسود، مش من اللي عندهم على حد سَوا البيض والسُود.

**جمس** (إلى ماتيلدة): شاطرة يا بنتي حقا الليلة الذوات، يصفقوا لك ويحدفوا لك زهورات.

**حبيب** (يقلد البربري ويقول إلى ماتيلدة): إهنا في أرضك يا ستي سامهينا على غلطنا، إهنا هسبناكي كعب الخير هابيتنا.

**ماتيلدة** (تقلد بنبة وتقول لحبيب كأنه البربري): أديك يابو روضة رسيطني على أحوالك، بقى انت بتتمعشق مع الجارية عوضا تنتبه لأشغالك.

**حبيب:** لا يا ستي إهنا ننبه شُجُلنا وهياة رمضان ويوم العيد، وما بيتمعشجوش مع كعب الخير إلا من بعيد لبعيد. واليوم وهياة سَتِّي سينب ما سَمِعَت مِنَّا كلام، ولا جُلْنَا لها إن من الهُب طول الليل ما ننَّام. الهُب يا ستي بنبة يدخل الجَلب زي الإبلِيس، هُب كعب الخير رايش يموت أبو روضة فطيس. أنا أهب الهلال ما أهبَّس الهرام، أنا في أرضك جوِّزيني كعب الخير بعد شهر تمام.

**ماتيلدة:** ما لك إلا رضا خاطرك يابو روضة، اكتب كتابك على كعب الخير أم عين سودا وأسنان بيضا.

**جمس:** عفارم يا ماتيلدة فكدا إذا عَصِيوا الجماعة اليوم، نلعب كوميدية البربري وما ينوبهم إلا الاحتقار واللوم.

**ليزة:** ونلعب كمان كوميدية «الصدّاقة» أم خمسة أشخاص، اللي انبسطوا منها العام والخاص. أنا ألعب فيها سِتِّي وردة، وعارفة الدور من راسي زي القردة. أقوله لك يا موسيو جمس انت تعرفه، لكونك كاتبه ومؤلفه.

**جمس:** طيب سمعيني يا ليزة، جزاكي الله خير يا عزيزة.

**ليزة:** ما أَمَرَّ الفراق، على المحبين والعشاق. من ساعة ما سافر نعوم من هنا، عندي كل يوم بمقام سنة. أه فين أيا منا الحلوة فين؟ كنا في وقتها صغار الاتنين. أنا كان عمري يا دوب اتنا عشر، ونعوم كان ابن ستعاشر. الكلام دا صار له سبع سنين، ياما كُنَّا أيامها مبسوطين. كنا ننزل نلعب لوحدا في الجنيّة، والورد والياسمين يظللّ علينا.

**ماتيلدة:** يا هل ترى كنتم تعملوا إيه تحت ظل الياسمين؟

**جمس:** ما تقاطعهاش خليها تعيد دورها قبلما يجوا اللعيين.

**ليزة:** ماتيلدة يابو جمس مَنِّي بتغير؛ لأني في اللعب باعجب العالم من كبير لصغير. **ماتيلدة:** بقاش في الدنيا بنت أكثر من دي قبيحة، على رأيها أنا الهبلة وهي الفصيحة. وراس بنبة ما بقيت ألعب ولو تَقَلَّتني يا موسيو جمس بالألماس، ما بيعجيش غير لعب ليزة الناس. خليها من اليوم ورايح تلعب وحدها، وتسلب عقول العالم بصفار خدها.

**ليزة:** أنا فصاحتي بتجعل وجهي مليح، وانت هبالتك بتخلي وجهك قبيح.

**حبيب:** دي ماهيش عيشة دا مرض وعذاب أليم، مسكين جمس حيران بيناتكم والله العظيم. على أقلها شيء حالاً تفتحو حلقكم وتفجروا تقبّحوا.

**جمس:** اسكت أنا برضي أتحملهم يا حبيب، ماتيلدة وليزة قلبهم طيب بس خُلُقهم قريب. يا ابني مَن صبر نال، ربنا يصبرني على دا الحال. يا بنات وحياتي عندكم، تتباوسوا وتسامحوا بعضكم.

**ليزة (تبوس ماتيلدة وتقول لها):** إذا ما كانش على شان خاطر جمس ما كنتش أصلحك.

**ماتيلدة:** وأنا الثانية على شان خاطر عيونه باسامحك.

**حبيب:** بقى اتفقنا على كده يا ستات، ما تخبروش العاصيين بأمر الماهيات. وإذا ما اصطلحوش وحبُّوا يعملوا معنا خناقة، موسيو جمس يطردهم واحنا ومترى واسطفان نلعب الليلة كوميديتي البربري والصدّاقة.

## المنظر الخامس

(حسن ومترى واسطفان وإلياس وحنين وعبد الخالق وبطرس والمذكورين)

**حسن:** يا موسيو جمس أهم جو الجماعة، ما بقاش على الظهر غير ربع ساعة. إنما إذا طاوعوك، برضه ربع الساعة مبروك.

**حبيب:** ما تخافش يا حسن على الرئيس، إن كانوا هم عفاريت يغلبهم جمس الإيليس. **مترى** (يدخل ووراء الجماعة فيقول لجمس): أول كل شيء أسعد الله الصباح، ولا يحرمك من الصحة والنصر والنجاح. ثانيًا أخبرك يا ابو فضائل حميدة، إننا حافظين على الغيب لعبة البورصة الفريدة. نلعبها الليلة إن شاء الله وتُنسَر من لعبنا، وتعطي كل واحد منا جنيه بخشيش بإذن ربنا.

**اسطفان:** أبو جمس والله العظيم، ما فيش في مصر رجل زِيه كريم. ما يَعْرِض علينا لا قروش ولا جنيهات، وأحب ما عليه يجيب لنا من الميري ماهيات.

**عبد الخالق:** بلا مسح جوخ يا اسطفان بلا تمليق.

**إلياس:** قال ماهيات! استنا يا تور لما ينبت العُلُق.

**حنين:** بقالنا في دا الأمل تقريبيًا سنة.

**بطرس:** واليوم ما بلغناش القصد والمُنَى.

**جمس:** ربنا كريم حلیم فرجه قريب، الصبر مليح اصبروا عليّ زي مترى واسطفان

وحبيب.

**ماتيلدة:** بس حبيب ومترى واسطفان؟ وأنا وأختي ليزة صابرين عليك كمان.

**عبد الخالق** (يوشوش إلياس وبطرس وحنين ويقول لهم): دا جمس وحبيب بكلمتين، ميّلوا راس البننتين. ويمكنهم الليلة مع أصحابهم يلعبوا بلانا، ويغيطونا ويطلعوا جيوبهم بالفلوس مليانة. أما احنا نكتم الدم على القيح إن كنا جدعان، ونلعب معهم وبكرة نورّيهم شغل الفرسان.

**إلياس:** يا عبد الخالق شورتك مليحة.

**بطرس:** جميعنا نتبع دي النصيحة.

**حنين** (يقول لجمس بصوت عالي): كم عندنا من كوميدية نلعبها في ر الليلة السعيدة؟

**جمس:** كوميدية «الحشّاش» و«البربري» ورواية «البورصة» الجديدة.

**اسطفان:** لعبة البورصة ما أظرفها! ما نخافشي عليها؛ لأن مترى أتقنها ويعرفها.

**حبيب:** وكوميدية البربري المنيفة، عادت لها دلوقتي قدامنا سِتِّي ماتيلدة اللطيفة. أمَّا لعبة الحَشَّاش كلها على سي إلياس مبنية، لعبها مرارًا وعجبت باشاوات وبيكوات وأفندية. **عبد الخالق:** ورينا محاسينك يا سي إلياس ورينا، وقل لنا منها كلمتين حلوين تسَلِّينا. **إلياس:** أنا أشخَّص فيها ملك بني شداد، وأغنِّي على الجوزة دور يجرح الفؤاد. **جمس:** هُس يا جدعان لأن الوقت راح، خُلوه يقول دوره وعلى المولى النجاح. **إلياس (يغني):**

جوزة من الهند ومركب عليها غاب  
مدندشة بالودع ومجمعة لحباب  
أخذت منها النفس والعقل مني غاب  
يا ليلي يا عيني يا ليل

**عبد الخالق:** أه يا ملك أه يا رد قهوة الشيرة، والنبي لتستاهل تعميرة. **إلياس (يقلد الحَشَّاش ويقول):** طلقت الاتنين ورقت لحالي، وفضلت جلجل يا غزالي. لا جديدة ولا قديمة، مالك حرية نفسي والحرية عظيمة. يا محلا عيشة العازب ما حد يقول له بتعمل إيه، كنت فين ورايح تخرج ليه؟ أمَّا يا ملك إذا مت ستين سنة، يعني الدنيا دي فيها هَنا؟ أه يا حظ إذا أنا مت ليلة العيد الكبير، ياما تبقى موتة تكن موتة أمير. وإذا كان في رمضان، يبقى أقوى يا جدعان. لكن يا حِدق بس أدخل الجنة وأنا صايم، والناس تاكل الفواكه وأنا واقف ملجَم نايم. أديني قاعد وشايف فواكه الجنة قدامي، وما نيش قادر أمد إيدي أخذ لي تفاحة، أه يا غرامي. **جمس:** دا يكفي يظهر إنك تعرف دورك يا سي إلياس، ولا شك إن الليلة تنسَر منك جميع الناس. بقى كونوا يا أولادي في ربنا متعشمين، هو يحميكم ويجبر بخاطركم أمين. الليلة أنتظركم هنا الساعة واحدة تمام، وإن شا الله تبلغوا القصد والمرام. **عبد الخالق:** بالله عليك يا موسيو جمس ماتعشمناش زي العادة، إحنا من يوم ما دخلنا التياترو العربي ماشفناش سعادة.

**بطرس:** دا صحيح والكلام يطلع من العيون، واللي يلعب مِنَّا من غير ماهية يبقى مجنون.

**إلياس:** أمَّا أنا الليلة دي ما أَلعبش لا حَشَّاش ولا مَشَّاش.  
**حنين:** هو حد في الدنيا يلعب بلاش؟

**حبيب:** ليه يا حنين تنكر الخير ليلة ما لعبنا في قصر النيل، وتشرف جسم بلقب موليير. لما كوميدية القَوَّاص وشيخ البلد وراستور عجبوا خديونا إسماعيل. الماية جنية اللي جوله من أفندينا إنعام، فرقها كلها علينا بقى حرام نتكلم في حقه ردي يا خسيس، والله إذا سابنا جسم ما نجد مثله رئيس.

**حنين:** بقى أنا خسيس انتم شاهدين؟ والله ما حد خسيس غيرك ومنافق ولعين.

**حبيب:** أنا لعين ومنافق يا حنين، وراس جسم إذا ما خرست أضربك كفين.

**جسم:** بقى انتم جيتوا تعيدوا الكوميديات أو تعملوا لنا خناقة؟

**ليزة:** يابويا جسم خليم يروحوا واحنا نلعب لوحنا البربري والصداقة. مع متري واسطفان وحبيب، وربنا كريم حليم أملنا فيه لا يخيب.

**عبد الخالق:** بقى فهمتوا الاتفاق يا إلياس يا بطرس يا حنين، اللي حصل قبل مجيئنا

بينهم وبين البننتين؟

**ماتيلدة:** أيوا اتفقنا مع موسيو جسم ورايح يعين لنا ماهية، ويفصل لكل واحدة منا بدلة حرير بهيئة.

**متري:** الكلام ده يا موسيو جسم حق؟

**اسطفان:** بقى البنات تنصر واحنا من الغيظ نطق؟

**إلياس:** يا متري يا اسطفان بلا لعب بلا وجع راس.

**بطرس:** تعالوا معنا اسمعوا شورة إلياس.

**حنين:** يا حضرة الرئيس خليك بعافية مع جناب السّتات، ربنا يهنهم بالبدلات

الحرير والماهيات.

**عبد الخالق:** والله ما هم طايلين شيء يا حنين، ده الباشا إياه راح يعطي بكرة

لجسم سريتين. يقرؤا ويكتبوا ويشخصوا روايات، وحالاً جسم يطردكم يا بنات.

**ماتيلدة:** إنت سامعة يا ليزة د الكلام؟

**ليزة:** حقا يابونا جسم إذا تركناك اليوم ما عليناش ملام. يالله بنا يا إخواني يا الله

بنا، اتكالنا واعتمادنا على ربنا.

**جسم:** يا حسن الحقني بخنجر أو بطبنجة الحقني، أو هات حبل واخنقني. أموت

وأرتاح من دي العيشة الهباب؛ لأنني ما بقيتشي أقدر أحمل قدر كدا عذاب. يا رب موة

موة يا رب العالمين، أخلص بها من شبكة اللعييين. بس من بيت أبويا أجيب لكم ماهيات

يا إخواني؟ يعني مدخول التياترو بيروح فين مش بفرقه عليكم ليلاتي؟ وده ما عدا اللي

بصرفه من عبّي، بقى انعم عليه بموة يا ربي.

**حبيب** (يقول إلى اللعيبين): والله جسم بينكم حيران، وإذا طاوعمكم آخرته المُرستان. يومي على الله لكم طلبات، يوم بَدُّكم في ملبوس جديد ويوم تعيين ماهيات، ودائمًا في خناق وزعيق، ده شيء يعل ويخلي الروح تضيق. والله لو كنت منه ماكنتش أصبر على دا الحال، إلا واسيكم تخطبوا وأطلع من باب الجمال. وفي وقتها تشوفوا إن من غير أبو جمسة، وربنا العزيز ما تَسُووا ولا خمسة.

**مترى:** إن كان هو حيران إحنا كما تعبانين، ياما أشقى عيشة اللعيبين! دول يا إخواني غلبانين جيوبهم دائماً فارغين، ومع دا كله محسودين. إذا مشيوا في الطريق، مساكين أنفاسهم تضيق، من الهوان والتهزيق، والتنكيت عليهم والتقريق. وإذا واحد منهم أراد يظهر محبته والوداد، لمن يعزّه ويريده الفؤاد، يقولوا له: إحنا في التياترو يا واد؟

**عبد الخالق:** بلا كترة غلبة يا مترى الوقت راح، يالله بنا مانتاش سامع جسم بيطلب سلاح؟

**جسم:** طلبي في السلاح لقتل روحي من شدة عذابي؛ لأن كترت عدوئني وقلّت أحبابي. يا ناس أنا في عرضكم شوفوا لي موة هينة بها أموت، وإلا اللي مرادكم تعملوه اليوم اعملوه بعد الليلة دي ما تفوت. ولا تشمتوش فينا العدوئين، وأنا بكرة والله أروح عابدين. وأطلب من صاحبي خيري باشا فخر الذوات، يكلم أفندينا يأمر لكم بماهيات. والله دا أنا في عرضكم العبوا يا أسيادي، وفرحوا الأصحاب وغيظوا الأعادي.

**ليزة:** مسكين يابويا جسم كلامك بيقطع قلبي، ما تخافشي أنا أقعد معك وأصبر على غُلبتي. ليزة عمرها ما تخون جسم أبوها، وإن خِلَّانها وأقاربها تركوها. دي ليزة صادقة في محبتها، وإذا وعدت لا تخالف كلمتها.

**ماتيلدة:** وأنا زيك يا ليزة ما اسيبوش.

**حبيب** (يقول للجماعة): البنات كلهم حن قلبهم وانتم ما ترحموش؟ إن كان مش على شان خاطر جسم الي ما بيشفقش عليه قلبكم، العبوا الليلة على شان خاطر أبناء وطننا العزيز الي بينسطوا من لعبكم.

(جميع اللعيبين واللعيبات ما عدا حبيب يقولون): نلعب الليلة على شان خاطر عيون موسيو جسم أبونا، وأفندينا والذوات والأهالي الي بيحبونا. لأن لو لم يكن أشمال أنظارهم علينا، وحضورهم كل ليلة إلينا، ما كانشي التياترو العربي صَح وانشهر، وخديوينا بنجاحه افتخر.

مولير مصر وما يقاسيه

**جمس:** الله يحفظكم ويحرسكم لي يا أولادي، طالما انتم وياي ما أخافش من الأعداي.

(حينئذٍ نزلت الستارة على رواية مولير مصر أبو نَطَّارة.)





